

## Արեւ

Արև՛, արև՛, դու մեզնից  
Երբ հեռացար դեպ հարավ,  
Ձմեռն եկավ և ամեն ինչ  
Հափշտակեց ու տարավ:

Աստված սիրես, էլ մի՛ գնար,  
Մի՛ թողնիր մեզ քեզ կարոտ,  
Քեզ կըպատվենք, քեզ կըգովենք  
Միշտ՝ իրիկուն, առավոտ:

Որքան գոհ ենք, որ դու բերիր  
Գարնան անուշ եղանակ,  
Ա՛խ, երանի գարուն լինի  
Տարին բոլոր ժամանակ:

Տես թե ինչպե՛ս փթըթել են  
Ծառ ու ծաղիկ, կանաչ խոտ,  
Տես թե ինչպես տարածվել է  
Ամենայն տեղ անուշ հոտ:

Քեզ են գովում թռչնիկները  
Իրանց քաղցր դայլայլով,  
Հովիվը իր մեղմ սրինգով,  
Հողատն անուշ հոլովով:

Չե՛, արև ջան, էլ չըգնաս,  
Էլ չըթողնես մեզ կարոտ,  
Գնա քնի՛ր գիշերները,  
Առավոտը եկ մեզ մոտ:

**Ղազարոս Աղայան**